



Sedecias est pris, les yeux luy sont creuez, & est mené captif en Babylone, & le Temple pillé & ruiné

EN l'an neuvième du regne de Sedecias, Nabuchodonosor Roy de Babylone vint avec vne grande armée enuironner Ierusalem, & avec telle puissance fut serrée de fort près, & la famine les pressa si fort, qu'ils deliberent de se sauuer, mesmes les principaux hommes de guerre s'enfuirent de nuit par la voye de la porte, qui est entre la double muraille vers le iardin du Roy. Aussi Sedecias fuyant és lieux champestres abandonné de ses gens, fut pris par les Chaldéens en la plaine de Iericho, & par eux mené au Roy de Babylone en Reblatha, lequel luy ayant fait tuer ses fils en sa presence, luy fit creuer les yeux & lier de chaines, & mener en Babylone, comme aussi il y fit mener tout le peuple qui peust estre pris, laissant seulement les vigneron & laboureurs de terre. Aussi furent pris par Nabuzardan Prince de l'armée, les Sacrificateurs & Prestres, & tous ceux qui seruoient au Temple, lequel fut pillé de tous ses vaisseaux dont Salomon l'auoit orné, & de furie furent aussi rompuës les colonnes, chapiteaux, soubassements & autres ornemens dont ce lieu estoit decoré, qui fut delaisé en desolation fort deplorable.